



(khas bagi majalah Qalam – tidak dibenarkan dikutip)

-----\*-----\*

Muhammad Bin Al Haj Ismail Keting Balik Pulau, Penang  
bertanya : “Bolehkah tasbih (berzikir) dengan kuat  
dalam masa membawa jenazah?

Jawab : Berzikir atau membaca tasbih, membaca Quran, burdah  
dan seumpama dengan nyaring atau perlahan pada ketika menghantarkan  
jenazah sebagaimana yang biasa, atau kerap kali dilakukan itu  
tiada warid daripada Nabi (SAW) dan tak pernah pula dilakukan  
oleh sahabat-sahabat, tabiin dan imam-imam yang empat. Dengan  
keterangan-keterangan ini maka sudah tepat perbuatan yang demikian itu  
melakukan perbuatan bidaah munkaroh yang wajib dijauhi  
daripada tiap-tiap kita orang-orang Islam. Yang dipertahankan oleh Nabi  
tatkala menghantar jenazah itu ialah diam dan tafakur  
berzikir atas keadaan jenazah itu iaitu telah kembali  
ke rahmatullah yang di dalamnya menginsafkan kepada orang yang  
hidup bahawa ia akan kembali ke sana jua nanti.

Yang disuruh ialah – sabda Rasulullah (SAW) (maksudnya):  
Zaid Ibn Arqam telah berkata – Rasulullah (SAW) pernah  
bersabda – sesungguhnya Allah yang Maha Mulia suka kepada diam atas  
tiga perkara – ketika membaca Quran, pada masa mara  
di medan perang dan pada masa menghantarkan jenazah.  
(Hadith riwayat Thabrani).

Suatu riwayat lagi : (maksudnya) Abu Hurairah telah  
berkata – Adalah Nabi (SAW) tidak suka kepada suara yang  
nyaring pada tiga perkara – waktu menghantarkan jenazah, pada  
waktu berzikir, dan pada waktu perang. (Hadith Shahih  
riwayat Abu Daud).

Peringatan: pertanyaan-pertanyaan yang tidak disertakan tanda tangan  
dan alamatnya yang terang tidak diraikan. Juga  
pernyataan-pernyataan yang mengenai disekeliling hal ehwal masyarakat  
kita itulah yang diutamakan daripada soal yang sulit-sulit  
dan jarang berlaku oleh kerana ruangan ini adalah  
berguna juga untuk panduan pembaca-pembaca.

-----\*-----\*

Satu lagi (maksudnya) Ibn Umar telah berkata –  
Rasulullah (SAW) pernah menegah kita menghantarkan jenazah yang  
bersertanya ada suara.

Dengan keterangan-keterangan ini mudah-mudahan dapat kita berdaya  
upaya menghapuskan barang-barang yang diada-adakan itu.

-----\*-----\*

Yusuf Ibrahim Sekolah Bagan Datoh, Perak bertanya :  
Mengapa orang ramai mencela dan memerangi faham-faham komunisme.

Jawab : Bagi kita orang Islam sudah terang dan  
nyata bahawa pengajaran-pengajaran komunisme itu adalah bersendi  
kepada kebendaan semata-mata dan ia mengambil hak dan kebolehan  
perseorangan yang sudah tentu berlawanan dengan pengajaran-pengajaran  
agama kita.

Apabila seseorang berpegang kepada kebendaan semata-mata maka  
bermaknalah ia menafikan adanya kekuasaan Tuhan dan sebab  
itulah mereka memandang “bahawa fahaman-fahaman agama itu hanyalah  
madah semata”. Mereka memandang bahawa tiap-tiap yang terjadi  
dalam dunia ini hanyalah tabiat kejadian semata-mata – tidak ada  
kekuasaan yang ada daripadanya. Tetapi mereka lupa umpamanya  
apabila kita terpandang sebuah kerusi maka dengan serta merta  
fikiran kita akan mengatakan tentu ada pembuat kerusi  
itu dan demikian juga tiap-tiap adanya kita itu tentu  
ada pembuatnya iaitu Allah Subhanahu wa Taala.

Demikian juga tentang hak perseorangan di dalam  
pemerhatian komunisme itu, hak perseorangan itu  
dihapuskan. Mereka menjalankan suatu faedah menjadikan

perusahaan itu di dalam lingkungan bersama dan menjadi hak negara serta pertahanan. Bencana-bencananya dapat diperhati dan didengar daripada buku-buku yang diterbitkan oleh kita di Malaya ini di dalam mana mereka menjalankan cita-cita mereka itu dengan cara kekerasan membunuh dan menumpahkan darah – supaya mereka dapat menguasai sesuatu daerah yang akan ditanamkan faham-faham mereka sekiranya di dalam negeri orang mereka boleh membuat yang demikian maka betapa pula nanti kalau kekuasaan itu ada atau terletak di dalam tangan mereka sendiri – sudah tentulah lebih dahsyat dan lebih bermaharajalela. Selain daripada itu ia berlawanan dengan pengajaran Islam.

Islam adalah menggalakkan tiap-tiap seorang itu mencari kemewahan dibumi Allah ini dengan rajinnya dan tekun dan sangat mencela kepada orang-orang yang malas. Tetapi apabila ia telah mendapat harta maka diwajibkan baginya membayar zakat harta yang diuntukkan kepada fakir dan miskin yang terutamanya dan kepada kebaikan masyarakat pada umumnya dan selain daripada itu adalah digalakkan mereka supaya bersedekah dengan memurahkan tangannya untuk membantu saudara-saudaranya. Yang demikian ini sudah tentu memberi kebebasan seseorang dengan adil dan saksama untuk mendapat faedah-faedah daripada usahanya sendiri yang sesuai dengan keadaan dan kejadian manusia. Yang demikian inilah sebab-sebabnya orang ramai mencela fahaman-fahaman komunisme itu.

-----\*

Tahir bin Ismail, Tanjung Malim, Perak bertanya :

Bagaimana seseorang itu boleh kekal persahabatan dan bagaimana cara-caranya?

Jawab : Cara kekal persahabatan itu adalah bagi kedua belah pihak berkang berlebih – nasihat menasihati dengan tidak mudah mengambil hati. Apabila didapati bersalah faham, maka janganlah diambil paksaan semata-mata mengikut fikiran kita sahaja, tetapi raikanlah fikiran kawan sekiranya fikiran itu patut dan tidak membawa kepada kita melakukan sesuatu yang melanggar suruhan-suruhan agama. Sekiranya

kita kerana meraikan sahabat mesti mengikut kemahuannya dengan melakukan perbuatan-perbuatan yang asi maka perbuatan yang demikian itu janganlah dikekalkan kerana ia membawa bencana. Pepatah orang-orang tua ada mengatakan baik-baik memiliki kawan – jika kita berkawan dengan orang baik sedikit sebanyak kita akan menjadi baik, jika kita berkawan dengan pencuri sedikit sebanyak kita menjadi pencuri. Jadi persahabatan yang diikat itu hendaklah persahabatan yang membawa kebaikan dan persahabatan yang tahu berulur bertarik dan yang datang di dalam masa kita susah bukan yang bersahabat di dalam masa kita tertawa.

-----\*

Sufian bin Haji Hamzah Kampung Sempinh Batu Kurau bertanya : Bagaimana kalau seorang paderi atau sami atau lain-lainnya daripada agama lain bertanya – iaitu bagaimana dikatakan agama Islam itu lebih daripada agama lain – jika kita jawab dengan ayat-ayat Quran tentu ia tidak mempercayai. Jadi bagaimana caranya?

Jawab : Yang pertama bahawa terlebih dahulu semolek-moleknnya seseorang yang hendak berhadapan dengan mereka itu mengetahui bahasa mereka. Dengan mengetahui bahasa itu adalah lebih mudah berbahas dengan mereka. Kemudian janganlah tuan-tuan terangkan tentang perkataan-perkataan ayat-ayat Al-Quran kepada mereka tetapi terangkanlah satu persatu terlebih dahulu riwayat-riwayat diadakan Tuhan agama-agama semenjak daripada Adam dahulu (jika yang bertanya itu daripada kafir kitabi) dan jika yang bertanya itu daripada Majusi maka hendaklah diterangkan kepadanya dengan secara membuka akal dan pandangan dengan halus – jangan dengan paksa. Setelah diterangkan yang demikian itu satu persatu dengan cara akal kemudian terangkan pula kepada mereka bagaimana hukum-hukum agama tuhan itu dihimpunkan di dalam Islam dan baharulah tuan boleh menerangkan satu persatu sebahagian daripada hukum-hukum Islam dan perintah-perintah-Nya yang tak dapat tiada bersesuaian dengan akal dan keadaan yang tak dapat diingkari oleh orang-orang yang siuman akalnya.

Ingatlah bahawa Rasulullah (SAW) pernah bersabda bahawa

tidak ada agama bagi orang yang tidak berakal.

-----\*-----\*

Awang Mansor bin Awang Jalaluddin Sungai Kedayan

Brunei bertanya : Seseorang perempuan berumur 99 tahun

mempunyai suami yang sihat – adakah pada akal dan adat

manusia jikalau ia menzahirkan anak?

Jawab : Harus. Tuan perhatilah Siti Sarah yang telah tua yang telah putus harapan daripada mendapat anak telah dikurniakan Tuhan boleh beranak setelah putus haid kerana tuanya dengan demikian maka yang demikian itu tidak menjadi suatu barang yang mustahil.

-----\*-----\*

Aminah binti Haji Saman bertanya : Manakah berguna menuntut bahasa Inggeris daripada menuntut bahasa Arab?

Jawab : Jika jawapan ini disandarkan kepada agama maka yang lebih aula ialah bahasa Arab, sebab dengan mengetahui bahasa itu dapatlah mendalamkan ilmu pengetahuan dalam agama dengan luas dan terutamanya dapat mengkaji kandungan al-Quran yang sangat utama itu. Tetapi yang bertanya itu bertujuan semata-mata kepada dunia – melihat keadaan sekarang bahawa bahasa Inggeris itu sangat berguna bagi kita hidup di dalam zaman ini dan dengan sebab itu baik ulama mahu pun orang kebanyakan sangat mustahak mengetahui kedua-dua bahasa itu supaya dapat kita membuka fikiran kita dengan luas dan menukar fikiran kita kepada umum terutamanya kepada bangsa lain tentang pengetahuan-pengetahuan agama.

-----\*-----\*

Jamilah binti Ahmad, Anak Bukit, Alor Star, Kedah

bertanya : Apa hukumnya jika seorang perempuan tiada haid daripada asalnya, apabila ia bercerai dengan suaminya adakah ia tidak beredah lagi?

Jawab : Perempuan itu tidak boleh berkahwin dengan

orang lain melainkan ia menyempurnakan edahnya dan edahnya

itu, jika dikira hidup tiga bulan, dan jika dikira

mati empat bulan sepuluh hari.


-----\*-----\*

Ahmad bin Umar Lorong Kota Tanah, Alor Star bertanya :

Mengapa orang-orang tua kita di kampung bila pagi-pagi hari

Jumaat melarang anak cucunya menyapu sampah di atas rumah?

Jawab : Cara yang demikian ini diadatkan pada setengah-setengah tempat oleh orang tua-tua dan pada setengah-setengah tempat lain tidak. Yang demikian ini hanya kepercayaan mereka sahaja dengan apabila ditanya kepada mereka, mereka akan mengatakan pantang yang sebenarnya tidak ada tegahan melakukan demikian itu di dalam Islam bahkan Islam menyuruh kita bersih sama ada pada diri, rumah dan sebagainya.



?